

萬 有 文 庫

第二集七百種

王 雲 五 主 編

衛 藏 通 志

附 校 字 記

(三)

商 務 印 書 館 發 行

衛藏通志

附校字記

(三)

國學基本叢書

衛藏通志卷十三上

紀略上 原目作方略

謹案唐古忒地方封建沿革不一。自元明以前。撫載源流。率多闕略。欽惟我國家列聖相承。神武遐播。雖衛藏附近外番時加侵掠。莫不震懾天威。佛界永資保護。我高宗純皇帝御極之五十六年。廓藩不靖。擾近西陲。五十七年。特命大將軍統師申討。極雪嶺懸絙之險。乃揚威月竄。遂叩籲天門。籍附版圖。歲通表貢。謹案年編纂用昭盛績。

順治年間。有蒙古固始罕。自青海起兵滅藏巴罕。據其地。至其子達彥罕。孫達賴罕。皆敬附中國。後有第巴薩木結專國倡亂。固始罕曾孫拉藏滅之。我聖祖仁皇帝襲封命嗣爲罕。其時達賴喇嘛化生於裏塘。名噶爾藏嘉木磋。青海蒙古搬至西甯之塔兒寺坐牀。適準噶爾逆賊策旺阿拉卜坦妄自生釁。自伊犁遣其賊將策凌敦多布領兵攻殺拉藏罕。擄其子蘇爾札。毀滅黃教。荼毒生靈。肆行猖獗。蹂躪藏地。我聖祖仁皇帝天地爲心。以一隅之未靖。慮一夫之失所。特遣將軍額倫特都統色倫額。革職四川提督康泰。統滿漢官兵。分道剿伐。渡通天河。即木魯烏蘇河三敗賊衆。而策凌敦多布分兵

遇我糧餉軍中食盡將士枵腹至哈拉烏蘇爲賊所困全軍餓斃其提督康泰至拉里之西爲賊僧黑帽喇嘛誘殺於是賊衆復逞螳臂肆其跳梁毀壞經典竊據藏地我聖祖仁皇帝赫然震怒遣靖逆將軍富甯安駐兵巴里坤以分賊勢爰命皇子允禔爲撫遠大將軍統帥六師駐節西甯調餉徵兵將塔兒寺之呼畢勒罕錫以達賴喇嘛名號給與冊印俾其主持黃教由是遣平逆將軍延信固原提督馬繼伯加議政大臣銜山東登州鎮總兵官李麟等率領陝甘滿漢官兵於康熙五十九年四月護送達賴喇嘛自西甯出口進征而策凌敦多布猶敢施其故智三襲我營俱爲我軍所破斬獲甚衆賊師膽喪大將軍又遣征西將軍噶弼滿漢官兵由打箭鑪出口大將軍駐劄木魯烏蘇居中調度九月大兵會於藏擒巨賊藍占巴托托宰桑黑帽喇嘛僞藏王達克咱等招降逆羽夷衆於是策凌敦多布計窮力竭狼狽而遁西藏底定人民奠安月之十五日送達賴喇嘛坐牀勒封承教度生達賴喇嘛將其土地人民賜之居於布達拉。

定西將軍噶弼平定西藏疏

兵部爲欽奉上諭事據定西將軍噶弼等謹奏聞爲取定昭地事從前將拉里地方攻取奏聞臣等領兵暫且在拉里地方喂養馬匹駐劄與平逆將軍約會再行進取昭地在案我們差往打聽信息之人回來稟稱竹工之呼圖克圖迎來歸順今吹木丕勒宰桑

帶領準噶爾之兵六百名，蠻兵二千名，在於噶爾招穆倫之渡口，堅守墨竹工卡。章名爾自榮所前來，與我們之兵對敵，聞聽竹工呼圖克圖暫行歸順，臣即與衆人商議，我們若駐劄仍等約會日期，倘或吹木丕勒前來，將噶爾招穆倫之渡口，墨竹工卡堅守，將歸順我們之人，俱驚怕更變，則坐守事務有誤。我們即行起身，俟吹木丕勒未能措及之先，不若將墨竹工卡、噶爾招穆倫渡口攻取，再等西甯之兵一同前進，如此議定，即將滿漢兵內挑選三十名，扮爲唐古忒之人，先行差往打探信息。此際工布之第巴等親身前來稟稱，我等遵奉將軍之令，帶領工布兵二千名，在於工布伽木達地方下營，一同效力等語。臣等逐一賞明，令千總趙儒、第巴濟古爾，將銀緞等物拏去，前往工布伽木達地方，將工布之兵逐一賞賜。八月十六日，在於墨竹工卡地方約會，已經差去。臣等帶領滿漢官兵，於八月初六日，自拉里起身，到工卡爾拉地方。竹工之呼圖克圖，將伊地方人口數目冊籍呈送前來歸順，已到竹工地方。據我們從前差去之滿漢兵稟稱，墨竹工卡兒地方有唐古忒之兵，榮梭蒙古有千餘名，俱行安營，並無吹木丕勒之兵信息。次日，起身到墨竹工卡地方。據前行之先鋒稟稱，前邊劉營之賊，聞我兵到來，俱行撤散。現今彼處無兵等語。因此臣等即行前去，將墨竹工卡攻取。第巴達瓦等俱行賞賜安民。據差往噶爾招穆倫渡口驗看船隻之通事札錯阿拉木巴等稟稱，渡口無有船隻，問村莊人等，俱回稱船隻俱被第巴達克札收去，吹木丕勒宰桑找尋徹凌敦多布，已回達木地方。渡口第巴達克札曾積聚二千名蠻兵札營，知大兵取了墨竹工卡地方，兵丁俱已潰散。第巴達克札情願逃往沙漠地方。臣等即差千總趙儒、第巴濟古爾前往第巴達克札曉諭，爾原受聖恩之人，今聖主廣施法教，救護唐古忒之人，差兵前來，是爲爾等速行歸順。如若仍然兩意不順，即差兵將爾拏來問罪。如此差去。第巴達克札自沙漠地方又潛逃回家，前往搜尋，明白曉諭，如不歸順，即行拏獲。因此第巴達克札同趙儒濟古爾一同過噶爾招穆倫前來，接續喇嘛仲古爾達瓦等相繼歸順前來。看來此處唐古忒俱甚是恭敬第巴，凡事俱遵第巴達克札指使行事。因此第巴達克札暫行款待，令其在我們營中駐劄，探聽準噶爾賊人信息。俱前往達木、哈喇烏蘇等處地方，接我們西甯一路兵馬前去。伊等所食糧餉，俱係第巴達克札自昭地撥湊送去。昭地準噶爾之喇嘛甚多，此內亦有策凌敦多布，甚是靠用之人。第巴達克札雖經歸順，不可信服。臣等僉議得昭地地方，乃準噶爾賊人根基，我們速行由噶爾招穆倫過去。

攻取昭地。將伊集穴占住。四面路口堅守。斷賊糧道。準噶爾調來之唐古忒兵丁。暗地差人前去。令其各散。挑選兵馬。迎接西甯一路之兵。前來幫助。使準噶爾賊兵首尾不能相顧。合力易於剿滅。令第巴達克札傳聚皮船。於八月二十三日過河。即分隊。令二等侍衛那沁。郎中鄂哩等。帶領滿漢官兵。作第一隊。臣與都統五格帶領滿漢官兵。作第二隊。副都統吳那哈。總兵官趙坤。馬會伯等。帶領滿漢官兵。作第三隊。於二十三日五更進兵。將昭地攻取。所有大小第巴等。布賴琿等。寺廟之喇嘛聚集。將聖主廣施法教。救護圖伯特部落衆民之至意宣諭。衆第巴。民人。喇嘛俱跪稟。蒙聖主之恩。享受安逸。自準噶爾人等前來。將我們遭害。以除殘壞。天朝大兵到來。我們衆唐古忒部落人等。得復見天日。紛紛歡悅。舉掌叩首。臣等將昭地所有之達賴喇嘛倉庫。盡行封謹。於昭地堅固地方安營。於相通四面道路。俱派兵看守。斷絕準噶爾往來之人。運糧道路。又爲唐古忒字樣。用第巴達克札印信。將策凌敦多布處所有唐古忒之兵。暗地差人前去。令其各散。派綠旗官兵。前往噶爾丹色喇布賴琿等廟內。有堪布等。曉諭準噶爾喇嘛。準噶爾喇嘛等。幫助策凌敦多布。毀壞法教。將唐古忒人等殘毀。爾等即行舉出。與爾等出家之人無涉。若隱藏一名。俱歸罪於伊等。因此三箇廟內堪布衆喇嘛。將廟內所有一百一名舉出。準噶爾喇嘛內。有爲首者五名喇嘛。第巴達克札。各廟堪布等俱稱。伊等係策凌敦多布。甚是靠用之人。訊問此五名喇嘛。即行斬戮。其餘九十六名準噶爾喇嘛。盡行收禁。昭地監內。臣等挑選滿漢兵。整頓馬匹。即前往迎接平逆將軍延信之兵。幫護合力剿滅賊寇外。爲此謹奏等因。奉旨。將軍噶爾弼將得昭地奏摺。即鈔寫發往大將軍王。將軍富寧安。傅爾丹。盛京三處將軍。江南杭州荊州西安右衛將軍。各省督撫提鎮。欽此。

定西將軍噶勒弼平定西藏碑記

聖天子統御中外。覆育萬方。文德覃敷。化自古難化之族。武功赫濯。闢從來未闢之疆。允矣澤被無雷。威周出日。凡秉血氣。莫不尊親。獨策旺阿拉布坦。蠢爾無知。自外生成。

逞非蛙之見。肆螳臂之雄。暗令策凌敦多布。戕害喇嘛。荼毒生靈。邊臣奏報。上臨宸衷。軫此荒隅。陷於水火。爰命撫遠大將軍王親統貔貅。駐節木魯烏蘇。居中調度。指示機宜。遣平逆將軍延信。由庫庫爾寨一路進剿。命臣噶勒弼統領川滇荆楚江浙滿漢官兵。

由蜀進剿。於康熙五十九年四月十六日。自成都拜疏起程。由蜀之打箭鑪、裏塘、巴塘。以至乍丫、察木多。會集官兵。整隊進發。一由類烏齊、結結樹、冰噶、三達奔卡爲正兵。一由洛隆宗、碩板多、達隆宗、沙工拉、魯工拉爲奇兵。訂期會取拉里、墨竹工卡一帶地方。宜布天朝恩威。曉以順逆大義。撫歸戮叛。敗散賊番。降服準噶爾。委授之藏達格咱第巴阿角喇布坦。兵不血刃。於八月十三日直抵昭地。封倉庫。以待西師。撫僧俗而甯佛土。招回哈拉烏蘇助逆之蠻兵。斷彼拉撒達木餽賊之糧道。西師在前。我兵在後。而策凌敦多布等援散食絕。力竭勢窮。狼奔鼠竄。戢影遠遁。由是西來之達賴喇嘛。得於九月望日抵藏坐牀。僧俗皈依。遠邇傾嚮。歡聲振天。梵音匝地。共祝聖壽無疆。河山鞏固。此皆上賴廟謨宏遠。德威遐震。下仗諸臣布置。糗糧充裕。更兼將士奮勇。志切同讎。所以道經五千。履危峯雪嶺。有如平地。時歷四月。冒蠻煙瘴雨。而甘之若飴。壯氣凌雲。直入亘古師旅未到之絕域。而成此克捷之功也。勒之豐碑。恭紀道塗。年月云爾。銘曰。天地爲界。日月爲期。一洗塵氛。永靖荒裔。

御製平定西藏碑文。鐫石築亭於布達拉之前。

文敬編
卷首

雍正元年。

青海羅卜藏丹津叛。遁入藏境。撫遠大將軍羹堯克之。

青海羅卜藏丹津犯順。恐其擾藏。時撫遠大將軍羹堯松潘鎮總官兵周瑛領川兵二千餘名。由打箭鑪出。

口。自霍爾甘孜一帶。招撫未順番夷。直抵西藏。又遣雲南提督郝玉麟。統領雲貴官兵千餘名。駐劄察木多。以爲聲援。次年六月。探報羅卜藏丹津遁入藏境之克哩野地方。總兵官選精兵三百。同貝勒康濟鼐帶番兵萬餘。由陽八井一路兼程追逐。至噶勒藏骨察。阻雪回兵。是年。達賴喇嘛勒封西天大善自在佛。率領天下釋教達賴喇嘛。予以冊印。

雍正三年

師旋陞周瑛四川提督

雍正四年

春撫插類烏齊一帶番民

雍正五年

貝子阿爾布巴等作亂內閣學士價格等先馳赴藏

貝子阿爾布巴、公隆布鼐、台吉札勒鼐等謀殺貝勒康濟鼐、背逆不道藏民告變我世宗憲皇帝命內閣學士價格、副都

統瑪拉、洮岷協副將顏清如先馳赴藏撫綏人民以安番衆

雍正六年

都察院左都御史札郎阿赴藏磔阿爾布巴等於市

夏四月特授都察院左都御史札郎阿爲正帥護軍統領邁祿、西甯鎮總兵官周開捷副之率領永昌協副將馬紀師、神

木協副將周起鳳、花馬協副將惠延祖、波羅協副將劉永貴、及參遊各四員、帶領滿漢官兵八千四百餘員名、由西甯出口、又命散秩大臣兼鑾儀衛衛周瑛爲正帥、化林協副將楊大立、夔州協副將張翌、並遊守各四員、領四川兵千餘名、由霍爾甘孜一路進發、派雲南鶴勝鎮總兵官南天祥、劍州協副將姚起龍、廣羅協副將馮鑾、及遊守各三員、率滇兵三千名、由蔡木多一路進發、三路官兵尙未抵藏、台吉頗羅鼐糾後藏阿哩札什倫布等處番夷二千餘名、直搗前藏、擒獲阿爾布巴等、大兵到藏、縛獻軍營、維時左都御

史札郎阿等公同審實奏其叛跡。九月晦日，磔阿爾布巴、隆布鼐、札勒鼐等於市，并誅其子於布達拉之前藏地。復安勅封頗羅鼐爲貝子，總管西藏事務，並議遷達賴喇嘛於裏塘，以杜釁端。

冬十一月，遷達賴喇嘛於噶達城，住錫惠遠廟。

十一月二十三日，左都御史陞吏部尙書札郎阿、西甯鎮總兵官周開捷領官兵五千名護送達賴喇嘛自前藏起程赴裏塘。四川重慶

鎮總兵官任國學帶領兵一千名接替護送。大兵即由裏塘各回本汛。是年打箭爐廟工告竣，在噶達地方欽賜匾額曰惠遠廟，御製碑文（敬載寺廟門）。達賴喇嘛移住焉。裁化林協，惠遠添協。日泰甯協除協兵外另駐防兵千有八百，均爲達賴喇嘛之防護。內閣學士僧格、副都統瑪拉、前鋒統領邁祿、散秩大臣周瑛、副都統馬紀師並遊守各四員。秦蜀兵二千名，鎮撫藏地。察木多留滇兵一千名，派提督張耀祖、劍州協副將姚起龍駐劄其地，以作藏兵聲援。

雍正八年。

駐藏大臣、內閣學士僧格出防騰格哩達木。

準噶爾侵犯巴里坤卡倫，駐藏大臣、內閣學士僧格具奏，領遊守各三員，兵一千五百名、唐古忒兵一千名出防騰格哩達木，遏其奔藏之路。

復於玉樹白兔河、奔卡立馬爾、納克產、僧根物角四處各派千把總一員帶番漢兵數十名設卡偵探，每年秋雪降封山時撤回藏內。

雍正九年。

駐藏大臣、蒙古都統、內閣學士僧格出防騰格哩諾爾。

內閣學士、陸蒙古都統僧格出防騰格哩諾爾。夏六月，護

大立領川兵一千五百名更換副都統瑪拉及舊駐藏并臺汛川陝兵一千五百名十一月副都統瑪拉統領換回其駐劄察木多滇省官兵亦一例更換。

雍正十年。

駐藏大臣、蒙古都統青保出防騰格哩諾爾。

春。陞青保蒙古都統。同加銜總兵楊大立出防騰格哩諾爾。楊大立旋因事解京。秋七月。轉陞青保滿州都統。是年。副都統李柱、西甯鎮總兵

官周起鳳、四川督標中軍副將張可才、遊守各二員、兵一千名、更換都統僧格、前鋒統領邁祿、永昌協副將馬紀師、及舊駐之川陝官兵、而副都統李柱至甲寅病故。冬十二月。總兵官周起鳳領兵抵藏。越四月。永昌協副將馬紀師率川陝官兵一千名回汛。

雍正十一年。

秋八月。前藏駐防兵丁移駐札什城。

春。都統青保、副將張可才出防騰格哩諾爾。欽奉諭旨。於色拉寺大昭之閒。札什地方。另建城垣。留兵五百名。其餘撤回。夏四月。防兵回藏。由京換防之原任工部

尙書副都統瑪拉抵藏。都統僧格、前鋒統領邁祿、副將張可才率領官兵。於七月中旬分撥起程。八月。城工告竣。九月初四日。防兵移駐札什新城。

雍正十二年。

都統青保、大理寺卿苗壽革職解京。

都統青保、大理寺正卿苗壽緣事拏解回京。派出接替之散秩大臣伯阿爾珣、副都統那蘇泰。秋八月至藏。阿爾珣卒。是月。其駐劄察木多滇兵。全議撤回。裏塘川

兵一千名內。減撤四百名。派都司一員統領。移駐察木多。

雍正十三年。

秋七月。達賴喇嘛還前藏。布達拉坐牀。

準噶爾遣使求成。我世宗憲皇帝軫念生靈疾勞。允其所請。定界息兵。又以達賴喇嘛久離藏地。令其回昭。以遂其性。特命果親王至泰甯。賜以筵宴。副都統

福壽、兵部郎中祁山、理藩院郎中拉卜坦、四川督標中軍副將張聖學領駐防泰甯官兵五百名。於夏四月，護送達賴喇嘛。同章嘉呼圖克圖由惠遠廟起程。七月望二日，抵前藏。越七日，通達賴喇嘛於布達拉坐牀。九月二十五日，送章嘉呼圖克圖赴後藏。禮班禪額爾德尼傳衣受戒。冬至日，事畢。回至前藏。十二月朔，頒齋世宗憲皇帝遺詔至藏。

乾隆元年。

章嘉呼圖克圖入都。

章嘉呼圖克圖同齋詔熬茶之侍衛帶領副將張聖學並原護送達賴喇嘛來藏之川兵自藏起程入都。

乾隆四年，勅封頗羅鼐爲郡王，領藏事如故。

後頗羅鼐卒，其次子珠爾墨特那木札勒襲封。

乾隆十五年。

珠爾墨特那木札勒謀逆伏誅。駐藏大臣都統傅清、左都御史拉布敦爲其黨所害。駐藏主事策坦、

參將黃元龍殉之。

珠爾墨特那木札勒謀逆不法，駐藏大臣都統傅清、左都御史拉布敦廉其叛逆，密疏奏聞，恐逆賊猝生他變，遂召珠爾墨特那木札勒於樓上誅之。都統傅清、左都御史拉布敦爲其黨所害，主事策坦、參將黃

元龍殉之。（見寺廟門雙忠祠碑。）餘黨悉散。都統班第、四川總督公策楞至藏，具狀奏聞，欽奉諭旨，傅清、拉布敦加贈爲一等伯，入祀賢良祠，昭忠祠。子孫以一等子爵世襲罔替。都統班第、總督公策楞悉捕誅珠爾墨特那木札勒之餘黨，藏地始定。奉旨：除西藏大臣會同達賴喇嘛裁決。

乾隆五十三年。

廓爾喀侵犯藏境。唐古忒私和。廓爾喀遣使進納表貢。

夏五月。廓爾喀侵犯藏境。經駐藏大臣都統公慶麟、副都統雅滿泰具狀奏聞。並徵調四川兵馬糧餉。命御前侍衛

理藩院侍郎巴忠馳驛赴藏查辦。又奉諭旨。命成都將軍鄂輝、副都統佛智、四川提督成德、總兵官穆克登阿、張芝元等率領滿漢土屯各營官兵三千名。由打箭爐出口。四川總督李世傑率鹽茶道林鶴、川東道王啓焜駐劄打箭爐。督催運解糧餉。及調派官兵事務。布政使王站住、按察使和甯在成都率道府以下官員籌辦起運軍餉火藥。分派各站糧員事務。是年冬。我軍齊集前藏。廓爾喀遣沙瑪爾巴求和。侍郎巴忠將軍鄂輝遣總兵官穆克登阿、張芝元帶領噶布倫丹津班珠爾等赴交界地方議和。廓爾喀退還所占地界。并遣頭人等赴京進納表貢。都統公慶麟被劾革職。副都統雅滿泰降爲二等侍衛。調駐新疆。暫留副都統佛智辦理駐藏大臣事務。

乾隆五十六年。

秋七月。廓爾喀復擾後藏邊界。占據聶拉木。

七月二十二日。駐藏大臣都統保泰、副都統雅滿泰等具奏。本年三月間。通拉大山雪已融化。噶布倫丹津班珠爾呈請與噶布倫札什敦珠

布二人帶領戴琿等分爲八路。赴交界地方查閱駐守番兵。達賴喇嘛亦差札薩克喇嘛噶爾藏丹津一同赴聶拉木地方修理廟宇。於七月二十一日據脅噶爾督官報稱。六月二十四日查邊之噶布倫在聶拉木地方爲講論舊債事務。寄信與廓爾喀去後七月初六日傍晚。有廓爾喀頭人帶領七十餘人到來。次日早晨。又有廓爾喀頭人帶兵千餘名向聶拉木進發。噶布倫等見其人數衆多。不能阻攔。遂將該處穆薩橋拆毀。廓爾喀人等疑以爲斷其歸路。乃施放鳥鎗。兩相交戰。俱各受傷。廓爾喀人拆毀東橋。將聶拉木寨落占據。併圍困噶布倫等。隨傳問公班第達因何起事緣由。據稱。上次廓爾喀侵佔邊界時。蒙大皇帝發兵到來。廓爾喀畏懼投降。彼時將軍大人們定立邊界。兩家再無爭競。具有甘結合同。祇因唐古忒每年在聶拉木收取伊等稅銀最重。又給與伊等

鹽艸不好。已故噶布倫索諾木旺札爾亂行侵漁該處商民貨物。伊等屢懷忿恨。所議賠償伊等各項。一時不能完結。是以我等私相定議。連利息核算。共計銀四萬五千兩。作爲三年償還。本年五月。已將本年之項送過去。年廓爾喀寄來信云。汝等若再給一年。可以讓免一年之欠。令派大頭人講議。此字噶布倫等巡邊之便。寄信與廓爾喀。差人到聶拉木。彼此商議。今大約因此事起衅等語。

廓爾喀賊匪誘執噶布倫丹津班珠爾以歸。

駐藏大臣保泰等具奏。七月初六日。廓爾喀賊匪占據聶拉木。圍困噶布倫後。至初九日。有信字自廓爾喀寄到。將噶布倫等直裹入其地。查

脅噶爾地方距第哩浪古兩站。第哩浪古距聶拉木兩站。隨調取該二處番兵赴聶拉木救援。

八月。廓爾喀賊匪占據濟噹。

駐藏大臣保泰具奏。自前藏起程。於八月初三日。抵札什倫布。初四日。據都司徐南鵬稟稱。脅噶爾第巴頭人等帶兵往第哩浪古把守。遇噶爾喀賊兵。彼此打仗。見各處寨落已被燒

毀占據。仍退守脅噶爾營官寨。又綠營兵胡廷海盧獻麟等將熱索橋砍斷。廓爾喀復伐木搭橋。將濟噹占據。併將胡廷海盧獻麟等裹入其地。

保泰遷班禪額爾德尼奔赴前藏。

八月十六日。保泰遷班禪額爾德尼由陽八井北路奔赴前藏。仲巴呼圖克圖並未隨行。留都司徐南鵬帶領綠營兵一百二十名護守札什倫布。

廓爾喀賊匪擾至薩迦溝。

十八日。保泰自托布嘉地方具奏。據烏爾公剛稟稱。十六日。同前藏戴琿。帶領綠營。達木。唐古忒各兵。前至薩迦官寨上首一帶撤牆。遇賊。見有三千餘名。圍繞迎戰。適有禦賊頭隊達木官

兵。及唐古忒兵丁對敵不住。往後退走。賊人乘勢向前。公札什納木結。與固山達策巴結先後陣亡。達木兵陣亡者最多等語。又據馬得功稟。十六日。與賊對敵。唐古忒兵見賊。施放一二鎗。即行退走。惟達木兵尙知奮勇拒敵。無如祇有三百。衆寡不敵。以致陣亡。

過多賊乘勢占據薩迦廟居住等語。奉上諭。昨據保泰奏。與廓爾喀交戰。達木蒙古固山達策巴結。公札什納木結打仗陣亡。唐古忒等怯懦。見賊即行退走。達木蒙古兵丁甚屬奮勇禦敵。是以多有陣亡等語。固山達策巴結。公札什納木結打仗陣亡。甚屬可憫。着交部照陣亡例議卹。其陣亡達木蒙古兵丁。交保泰等查明咨部。一體議卹。唐古忒兵丁性極怯懦。見賊即行退走。實屬可恨。屬下兵丁不思保護公札什納木結。以致陣亡。本應將隨從兵丁治罪。今不加深究。即係伊等之幸也。偶有陣亡。亦必係被賊追殺。不應交部議卹。着保泰等剴切曉諭衆噶布倫戴琿等知之。欽此。

班禪額爾德尼抵布達拉。

八月二十六日。班禪額爾德尼抵前藏。在布達拉居住。

廓爾喀賊匪擾至札什倫布。仲巴呼圖克圖宵遁。

保泰等具奏。據都司徐南鵬稟稱。二十日。廓爾喀擾至札什倫布。仲巴呼圖克圖於十九日夜遁去。有供奉額沁騰格哩佛之

濟仲喇嘛。與札桑堪布喇嘛等禱驗龍單。言不可與賊拒戰。是以人心渙散。僧俗紛紛逃避。有藏入營官寨者。賴綠營兵丁嚴固保守等語。

九月。都司徐南鵬堅守營官寨。賊衆退回。

九月初十日。保泰具奏。都司徐南鵬稟稱。連日廓爾喀奪取營官寨。該都司等在寨內施放鳥鎗。打死賊匪頭人一名。賊兵十餘。賊見營官寨堅固

難攻。衆悉退回。是夜放火焚燒四圍所屯糧草。又戴琿敏珠爾多爾濟於九月初一日迎戰。殺賊十餘人。所帶貢布達克達克布各兵。均已受傷。退守白浪。又戴琿薩木珠凌巴在僧格宗遇賊打仗。受鎗傷陣亡。又丹津納木結打仗陣亡等因。

廓爾喀賊匪搶掠札什倫布財物以歸。

十六日。保泰具奏。據徐南鵬報稱。九月初七日。廓爾喀賊衆忽然撤回。將札什倫布金塔上鑲嵌珠石起下掠去。又據脅噶爾第巴報稱。廓爾喀賊衆二千餘

人至喀爾達地該處距帕克哩定結最近據古喀爾達有通霄噶爾江孜等處路經派遊擊李芝榮烏爾公阿等帶兵駐守江孜等因

冬十月協辦大學士一等嘉勇公福康安爲將軍超勇公海蘭察爲參贊大臣帶領巴圖魯侍衛章京一百員副都統烏什哈達岱森保爲領隊大臣帶領索倫達呼爾兵一千名由青海一路赴藏冬

十月奉

上諭廓爾喀滋擾後藏一事現派福康安前往督辦並令海蘭察等分起帶領巴圖魯侍衛章京一百員副都統烏什哈達岱森保分起帶領索倫兵一千名福康安現由山西一路赴青海前進海蘭察及巴圖魯侍衛章京等並索倫兵

丁俱由河南一路赴青海行走前已降旨令各督撫將應行預備車馬供給等項聽候軍機大臣酌定官員兵丁等起程日期分撥起數知會到日再行備辦毋庸過爲早計致令守候需時各督撫接奉後自能妥辦着傳諭各督撫等所有此次海蘭察及巴圖魯侍衛章京並兵丁等經過各處每省派遣員一二人分段照料入境出境專司車輛馬匹廩給等事到站即行應付不可稍有缺乏俾官員兵丁等行走得以迅速事畢各奏聞倘有需索擾累之處飭令該道據實稟報該督撫即行查辦欽此

協辦大學士署四川總督孫士毅駐劄打箭鑪調派征兵籌運軍餉

十六日大學士孫士毅自打箭鑪具奏爲欽奉諭旨令臣添調屯練降番二千

名合之海蘭察等帶領兵數及藏內現有之兵不過七八千人就西藏現備之糧及臣業經運送出口存貯之五千四百石再加飭令各台就近採買之稞麥等項實已寬然有餘所有現在請碾附近倉米一萬石據各屬稟報發運在途祇有三四千石其餘並有尚未碾出者臣現在遵旨催令運送五千四百石補還鑪倉撥出之數其餘一萬四千六百石飛札檄令不必碾運以省糜費至屯練降番先經鄂輝成德分帶二千二百名赴藏臣現復遵調屯練一千名降番四百名並革卜什咱巴底巴旺等處土練最爲壯健共調六百名以足二千之數計十二月初開自鑪起程到後藏時已在二月杪三月初開臣計算程途此時即須檄調以便福康安臨期應用派令曾經打仗之土目人等即由草地督領赴鑪並檄調署川北鎮諸神保令其統領二千名前赴福康安行轅伺候

調遣一面挑選曾經出師台灣、及攢拉促侵等處出色將備，隨同諸神保帶兵赴藏等因。奉上諭：孫士毅奏酌撥軍糈米石，運送察木多巴塘、裏塘等處，並檄停三十九族及滇省各兵等摺，實在盡心周到，可嘉可慰之至。已於摺內批示矣。繼務爲軍行要需，寬爲籌辦，源源接濟，方可無誤軍糈。但藏地程途遙遠，運送維艱，而就該處多爲採買，又慮艱於購辦，是以節次諭令孫士毅通盤核算，熟籌妥辦。今據孫士毅覆奏，檢查駐藏大臣原咨，該處倉糧及喇嘛商上，共有七千石，現可採買二萬石，牛羊一萬六千隻，每兵每日八合三勺，合計已可供萬人一年軍食。再加預備送藏糧石，即再增萬人，亦可充然等語。如此，則糧儲寬裕，敷用有餘。覽奏深爲欣慰。此時鄂輝成德先後帶領漢屯兵二千二百名，加以先期派往換班兵一千二百餘名，合之藏內原駐官兵，共計四千餘名。昨又降旨派巴圖魯、侍衛、章京一百員，令海蘭察分起帶領，索倫、達呼爾兵共一千名，令副都統烏什哈達岱森保帶領，由京自青海草地行走赴藏。本日據福康安奏請添調屯練降番二千名，於明春進剿賊匪，更爲得力。著孫士毅即先行派撥，屆期前往。所有停調滇兵二千名，竟可毋庸預備。著傳諭富綱，即行撤回本營，不必令其在邊境駐劄守候。其察木多巴三十九族兵二千名，亦著鄂輝等即一併撤回，無須調往。是統計明年大舉，所調滿漢、索倫、達呼爾、屯番兵丁，共有七千餘名，加以帶兵官員跟役人等，亦不過八千餘人。且此亦斷無須辦至一年之久。今孫士毅籌備糧石，是供一萬人一年之食，是支應已極綽然有餘。摺內所稱於成雅邛三屬倉糧內碾米二萬石，運糧轉送察木多巴，接濟西藏兵食一節，似屬可緩。雖孫士毅所辦糧石價值比在糧城採買減省，而由鑪運至察木多巴，則所費腳價甚多。即此次軍糈，必須寬爲籌辦，亦應照孫士毅前奏，於藏內就近採買，可以省至十倍。俟福康安抵藏查看該處情形，於現買二萬石外，將來或有需用，先儘藏內採辦支給，自足敷用。如藏內實不能即行添辦，必須內地接濟，再行咨會孫士毅陸續運赴，亦不爲遲。著傳諭孫士毅，此次成雅邛三屬所碾米二萬石，現在不必起運，以省糜費。總聽福康安到藏彼此酌商辦理，方爲妥善。欽此。

十一月，明正土司甲勒參諾爾布捐辦運夫棉衣。

十一月初八日，大學士孫士毅自打箭鑪具奏。明正土司甲勒參諾爾布感激皇上恩德，不但應發烏拉腳價，並未絲毫剋扣。又

自出已貨。將運米番民。每名給以棉襖一件。牛毛布絛一條。爲現在冰雪禦寒之具。邀請地方文武官。同賞給。以見其急公報效。臣已面加優獎。許以奏聞。是以旬日以來。烏拉更加踊躍。每日或三四百石。或五六百石。閒日趕運出口。口外糧運。派建昌道徐長發曉夜趕辦等因。

四川總督鄂輝革職。以副都統銜駐藏辦事。成都將軍成德革職。以副都統銜在領隊大臣上行走。

公奎林補授成都將軍。山東巡撫惠齡補授四川總督。俱馳驛赴藏。授爲參贊大臣。

初十日。奉上諭。上次廓爾喀因鹽稅

細務。與唐古忒人等彼此爭執。鄂輝。成德。同巴忠前往該處查辦。並不剖斷明確。一切皆聽從巴忠謬爲辦理。以致復滋事端。茲巴忠畏罪自戕。伊二人本有應得之咎。經朕格外加恩。不即問罪。仍令帶兵赴藏。一切自贖。鄂輝。成德理宜倍加奮勉。迅速償程。剋期抵藏。剿殺賊匪。以贖前愆。今伊二人任意延緩。每日按站行走。出口多日。尙未到藏。節據保奏。廓爾喀賊匪搶掠札什倫布之後。尙在定結。第哩浪古等處逗遛觀望。未經退回。此正天奪其魄。坐待殲誅。若鄂輝。成德行走迅速。早抵藏內。即可跟踪進剿。殲戮無遺。乃竟需滯不前。坐失機會。其錯謬甚大。豈可復膺封疆專閫。鄂輝著革去總督。賞給副都統銜。駐藏辦事。仍令舒濂幫辦。成德亦革去將軍。賞給副都統銜。在領隊大臣上行走。聽候福康安調度。差遣鄂輝。成德俱係獲罪之人。今復加委任。務須激發天良。勉力自贖。以觀後效。若再仍前貽誤。自必從重治罪。斷難復邀寬貸。所有成都將軍。著奎林補授。仍在參贊大臣上行走。其未到任以前。仍著觀成署理。俟軍務告竣。奎林再赴新任。四川總督員缺。著惠齡補授。其山東巡撫員缺。即著吉慶補授。惠齡現已諭令來京。陛見。俟將衛藏應辦事宜。面加指示後。即馳驛赴藏。先在參贊大臣上行走。同福康安剿辦廓爾喀賊匪。事竣。再回成都接印任事。現在應行備辦軍需糧餉等項。孫士毅悉心籌畫。均極周到。仍著任彼一手經理。俟惠齡事竣到任後。再行交印起程。來京供職。其總